

# KUMPONINGE OOKARA KAPOO' PUPU'UU'NA'

---

Ookara Kapoo'nanka Kumponing Pupu'uu'na'koong Minkunaa

**1** <sup>1</sup>Tenang tutuna' masipo' Kumponing aa'ning paning ee'noko kansi' nkovuu'nang. <sup>2</sup>Aung kansi' tee, emu' otoina' otoaruko'; naroomparava' otoko'; tamung domaang-po'ningmeeva otoko'. Dau-eta mutaanange daka'pui otoko' tee poonaru' baka otoko, ee'noko tee Kumponing bakaang Tanuaang tee-koo pirung-koo daue aavinuko.

<sup>3</sup>Tenang Kumponing karoma aa'puu', "Araka, tavo'daravai," ee'noko tenang araka oro'paru'. <sup>4</sup>Ee'noko Kumponing tee araka tampa' oovura dotuarara tee araka simpe'uu' mutaanang-eta. <sup>5</sup>Ee'noko Kumponing tee araka doonaa' tampuu' ee'noko mutaanang muung tampuu'. Teketa aa'nou' muung tankinuko tane'puu' ee'noko te'mung te'mung tutuna'na'mung.

<sup>6</sup>Ee'noko Kumponing napo' karoma aa'puu', "Meeroo'navaro doona otoai tankaampuresi pirung boonaru' ee'noko ntong kamo'koong." <sup>7</sup>Tee meeroo'navaro tee, Kumponing teing ntong meu' tankaampuree'naang nkovuu' boonaru' daunaru'keta. <sup>8</sup>Ee'noko Kumponing tee meeroo'navaro doona auvi'au tampuu', teketa aa'nou' muung tankinuko tane'puu' ee'noko te'mung te'mung ke'munta-na'mung.

<sup>9</sup>Teketa napo' Kumponing aa'puu', "Aia', ntong paning-koo boong oting naro' poontarako koverenoo' oro'paravai," ee'noko tee' masika' nkoaru'. <sup>10</sup>Teketa Kumponing te' koverenoo' kansi' tampuu' ee'noko tee ntong poonaru' pirung tampuu'. Ee'noko Kumponing tampa' oovura dotuaru'.

<sup>11</sup>Ee'noko Kumponing napo' karoma aa'puu', "Kansi'koo baa' ee'noko koi'nanka amutemurii' dupuai, aa'noko keenavaang, ee'noko pora'kooning, ee'noko sinampuai ookara muu' amutemurii' kantena.'" Ee'noko tee' ee'na' nkoaru'. <sup>12</sup>Kansi'koo amutemurii' baa' ee'noko koi'nanka amutemuu'na' sinampumaing dupuu', keenavaang ee'noko pora'kooning, teing-koo kuunge napo' oki'nareka' sinang nkoarikoo'

amutemuu'na'. Ee'noko Kumponing tampa' oovura dotuaru'.

<sup>13</sup> Teketa aa'nou' muung tankinuko tane'puu' ee'noko te'mung te'mung beenana'mung.

<sup>14</sup> Teketa napo' Kumponing aa'puu', "Aia', arakananka tavo'dariai meeroo'navaro-koo meu'ke teke paning-koo doong ee'noko muung simpe'aareaing, ee'noko teke aing aa'ning taa'ni'antavaari otoromaatoai: doonanka, kaarananka ee'noko mare'nanka. <sup>15</sup> Ee'noko teke meeroo'navaro-koo paning-koo arakavariri otoromaatoai teketa kansi'aape araka po'antavaamaatoai." Ee'noko tee' ee'na' nkoaru'. <sup>16</sup> Ee'noko Kumponing tee' araka pankeng kenaanka nkovretu', narung aa'na' araka doonaa' araka-koo miring duaa' nkovuu'. Ee'noko nii'nung baru' araka deeaung muunga araka-koo miring kaara nkovuu'. Napo' beento'nanka nkovuru'. <sup>17</sup> Teing paning-koo meu' nkovurira sipuru' teketa kansi'aape araka po'antavaamaato'naang. <sup>18</sup> Ee'noko teketa doong ee'noko muung tanatavaamaatoai, ee'noko napo' arakanaanka ee'noko mutaanang tankampaarematoai. Ee'noko Kumponing tee' ee'na' tampa' oovura dotuaru'. <sup>19</sup> Teketa aa'nou' muung tankinuko tane'puu', ee'noko te'mung te'mung karenana'mung.

<sup>20</sup> Ee'noko Kumponing napo' karoma aa'puu', "Ntong ee'noko pirung ookarai kapoo'nanka amutemurii' domantoo'nankai maanto'aavai. Ee'noko barennankai porora meeroo'navaro a'dei' auvi'au puraanaama maanto'aavai." <sup>21</sup> Tavi' pankenanka nkovuru' pirung-koo kuung otoromaing ee'noko ookara oki'nareka' kapoo' nanaamaing ntong-koo kuunge, ee'noko ookara bareng amutemurii'. Ee'noko Kumponing tampa' oovura dotuaru'. <sup>22</sup> Ee'noko Kumponing ookara biraankevuru' aa'puma, "Ookara kapoo'nanka pirung-kooning parerima berentarima pirung maanto'eriai, ee'noko ookara barennanka tee'ke, parerima berentariai kansi'koo." <sup>23</sup> Teketa aa'nou' muung tankinuko tane'puu' ee'noko te'mung te'mung pa'noko'na'mung.

<sup>24</sup> Teketa napo' Kumponing aa'puu', "Enang kansi'koo kapoo'nanka amutemurii' domantoo'nanka tavo'dariai: ookara kau'karenaumo bau'naananka, ee'noko biikoori, ee'noko ookara kapoo' kansi'koo daue nanaamaing." Ee'noko tee' ee'na' nkoaru'. <sup>25</sup> Kumponing kau'karenaumo pora'kooning amutemuu' nkovuru' ee'noko napo' bau'naananka amutemuu' tee' nari' nkovuru' ee'noko napo' teing kansi'koo daue kakanaamaing tee' nari' amutemuu' nkovuru'. Ee'noko Kumponing tampa' oovura dotuaru'.

<sup>26</sup> Teketa napo' Kumponing aa'puu', "Aia', naning-namuu' nantong nii' pina' oro'nuka nkoarampiai, niikaang oro'oro'noo' siompuio', ee'noko teinge ookara kapoo'nanka tanatavaariai, aa'ning: tavi' pirung-koonanka, barenanka auvi'au-kooning, kau'karenaumo datauraa'nanka, ee'noko pora'koonanka, ee'noko napo' teing ookara kapoo'nanka kansi'koo

daue nanaamaing.” 27 Tee'koo Kumponing naning baka bakaang oro'oro'noo' siompuio' nkovuu'. Tee' ee'na' nari' oro' Kumponing-pina' nkovuu', aa'nou' donkaani ee'noko manikuma nkovuretu'. 28 Ee'noko Kumponing biraankevurema aa'puretu', “Dee' parerema berentareai ee'noko deurukaa'ke ookara kansi' maanto'aara ookara kapoo'nanka tanatavaariai tenairu-koo. Ee'noko dee'ke tee aa'noaing ookara tavi' pirung-kooning tanataverereriai, barenanka auvi'au-kooning ee'noko ookara kapoo'nanka kansi'koo daue nanaamaing.” 29 Ee'noko Kumponing aa'puretu', “Overeko, ninge tee dee' aropesing ookara kapoo'nanka sinampumaing ookara-koo kansi'koo daue otorinanka; dee' deekaang taamang, ookara baa'nanka, koi'nanka, keenavaang ee'noko pora'kooning naro'ka. 30 Ee'noko ookara kau'karenaumo-nanka kansi'kooning, napo' barenanka auvi'au-kooning ee'noko ookara kapoo'nanka kansi'koo daue nanaamaing, ee'noko ookara kapoo' domantoo'nanka, ninge teing ookara kapoo' dupumaung maa'koo avoronsing.” Ee'noko tee' ee'na' nkoaru'. 31 Ee'noko Kumponing ookara kapoo'nanka teie nkovuru'ning tampa' masika' oro'pariko oovura dotuaru'. Teketa aa'nou' muung tankinuko tane'puu', ee'noko te'mung te'mung ~na'mung-taa-na'mung.

**2** 1 Tee' ee'na' nari' Kumponing aa'ning paning ee'noko kansi' bakevuu', ee'noko ookara kapoo'nanka mmau' nari' bakevuru'. 2 Ee'noko Kumponing ookara bakaang nko-nko nkovuru'nanka ~na'mung-taa-na'mung bakevura, te'mung ~ke'munta-taa-na'mung uaavou'. 3 Ee'noko Kumponing te'mung ~ke'munta-taa-na'mung biraankevura meeka'antavuu', ai' te'mung ee'na'mung tee, tee uaavou'na'mung bakaang nko-nko kansi' nko-koong bakevura.

#### **Tampa' Kuunau' Siraka'anta Kumponing Naninka Nkovuretu'na'**

4 Tenang tutuna' Kumponing kansi'naanka paning nkovuu'na'koong minkunaa' aung; 5 Tenang Ovinge Kumponing kansi' ee'noko paning nkovuu'nang kapoo' keenavaang tovang koi' dovang baa' otoaruko' kansi'koo, mme' Kumponing apo' botovuaruko ee'noko naning otoaruko' mintoong nkovupeu'nung. 6 Nka ntonoo' tenang ee'ngang tavo'arako' oki'nareka' kansi'koo dau tompatompanta-koo. 7 Ee'noko tenang ee'ngang teie Ovinge Kumponing naning kansi'koong da'mong-etab nkovuu', ee'noko ke'nie deto uupuvura domaang avuu' domang-antavuma ee'noko tee naning tenang domaang-po'nung deemparu'.

8 Teketa Kumponing tee naning nkovura tampoo' temu' nerievuu'noo' sipuu' teka Iideni'ka duaa' pomanoo'aapea. 9 Tenau tenau Kumponing koi'nanka amutemurii' tampa' oro'nanka keempuru'nau ee'noko sinang maa'koo tamparanankai. Ee'noko meeroo' tenau-koo koi' kevarira sipuretu': navari domaang isikung avu'navari; nii'navari noru' aa'ning tampara ee'noko orara avu'navari.

<sup>10</sup>Ee'noko teing ntong kareriiru te' Iideni' tavearikoo' tenau mintonau duu'paama, teketa nari deempari siarakoo'. <sup>11</sup>Tutuna'nari teing-koo miring Piison-nari, Aavila nameng, kooro-po'nameng, korovui pomanari. <sup>12</sup>Tee kooro temeng-koong tampara ee'noko narung napo' koi' tampa' nuuraa' otomanoo' miring deliam. Napo' kapang tampa' oro'nanka-po'noo', miring kaneliani, ereng naakiomaing. <sup>13</sup>Keriira-nari ntong miring Kiong-nari, Kus-nameng-eta pomanari. <sup>14</sup>Beeriiru-nari miring Taikirisi-nari, Asiria-nameensi'koo duaa' pomanoo'aapeita pomanari. Kareriiru-nari miring Iuperetisi-nari.

<sup>15</sup>Ee'noko teie Ovinge Kumponingee tee naning nkavura te' Iideni'nau-koo sipuu' tenau mintoompuma teke tarevui otoo'naang. <sup>16</sup>Ee'noko Ovinge Kumponingee botovuma aa'puu' tee naning, <sup>17</sup>“Ookara koi'koong sinananka mintoong-koo otaining-koong tamung naro'keta maa'emaatoaing, teka tevari koi'navari noru'anta nka-navari teing aa'ning-koo tampara ee'noko orara dake maa'eauka' tee sinang tevari-koong, ai' te'mung da' tevari-koo sinang maa'eainamung da' tee dooaing.”

<sup>18</sup>Teketa Ovinge Kumponingee aa'puu', “Aung naning baka oto'koo tampa' deea'. Ninge bakaang pakupakunung tee-koo makosi nkoevompaing.” <sup>19</sup>Teketa teie Ovinge Kumponingee teing kau'karenaumo-nanka ee'noko barennanka kansil'keta temu' nkovuru'ning te' Aadama-anko po'antavuru' teie namurii'na' oovurira miring tampurii'naang, ee'noko aming miring teie Adamai tampuru'nung teing kapoo' domantoo'nanka-koo tee tee biikaang miring deemparu'. <sup>20</sup>Ee'noko tenang Adamai mirinanka tampuru' teing kau' karenaumo-nanka-koong bau'naananka-koo ee'noko biikoorkoo, napo' ookara barennanka-koo tampuru', teka tee Aadama bakaang pakupakunung tee-koo makosi otoaruu'.

<sup>21</sup>Teketa teie Ovinge Kumponingee tee Aadama aa'na' aasi'antavuu', ee'noko tenang aatuko paramparang-koo koo'koo nari' bita'ura te' napo' bio'ke avo'antavuu'. <sup>22</sup>Ee'noko teri' paramparang-nari' nkavuu'nari'keta Kumponingee nani manikuma nkovuu' ee'noko teni te' Aadama-anko tavo'uu'. <sup>23</sup>Teketa Adamai aa'puu', “Emu' ani ee'nani mmaiko' masakani. Bakaang koo' tee ning-koong-eta koo'ketaing ee'noko bakaang bio' tee ning-koong-eta bio'ketaing. Ani donkaani-koong-eta koo'keta nkonii'nani naning-eta-nani, te'koo manikuma tampampaing.”<sup>a</sup> <sup>24</sup>Tee'koo tee' aa'nomaung naningee baumararing sipurema ba'aang ninka pinka'arekoo' ee'noko narung deemparekoo'.

<sup>25</sup>Tenang tee tering ookaring donkaani ee'noko teni ba'aang simpenoi'daring otoresiteka tee maia'orea'.

---

<sup>a</sup> 2:23 Iiburu-nupoong biikaang kara-koo “manikuma” ee'noko “donkaani” dapi' nari' aurompari otong.

### Aadama Dua'aru'na'

**3** <sup>1</sup>Ookara kapoo' avutevu' biikoori Kumponinge nkovuru'nanka-koo boru' bakei aa'na' torearo'. Teie tee teni manikuma aa'puu', "Kumponinge ee masika' ookara anau-koo koi'nanka-koong sinang maa'koo orokoruresing?" <sup>2</sup>Ee'noko tenie maku'uma aa'puu' tee boru', "Nee'ke aa' ookara koi'nanka-kooning sinang anau-kooning maa'koo makosi. <sup>3</sup>Teka Kumponinge aa'puing, 'Koi'navari anau-koo meu'ke otoiavari-koong deeko' dee'ke sinang maa'ereauka', aa'noko tamung kompereauka' tevari, doore'neenga.' "

<sup>4</sup>Nka teie boru'ke aa'puu' teni manikuma, "A, dee' bakei doorearoo'naang. <sup>5</sup>Dee'ke tee sinang teu'koong maa'ereta deeko' dee' tee noru' daate'daree'naang kapoo' tampara ee'noko kapoo' orara noru'koo, ee'noko dee' tee Kumponing-pina' nari' otoore'naang. Kumponinge tee' noru'ui dee' tee' orokoruresing."

<sup>6</sup>Ee'noko tenang tenie manikumai tee teu'koong sinang oovuko onou ee' oro' tavo'kuu', "Bakei aung sinang maa'koo tampara, oro'oro'noo' tampa' oro'ke, ee'noko maa'anko norukasi' deeng-antamupeu'." Tee ninka noru' ninka tee-koo sinang-koo nkavura maa'kuu', ee'noko nii'ning napo' tenie tee ba'ung nari' otoretu'nung avuio' maa'uu'. <sup>7</sup>Ee'noko tenang tee noru' ookaanka-koong daate'aretu', ee'noko tenang noru'aretu' tenaanka tee simpenoi'ka, ee'noko tenang koi' piiki'koong para'noo' nara'ka pate'ureta duaana nkosiiretu'.

<sup>8</sup>Teketa tenang kamunoo'ngang boimpuio' tenaankai tee Oving Kumponing teke mintoonge nanuko taaravuretu', ee'noko koi'nanka-koo meu' baku'aretu'. <sup>9</sup>Teka teie Ovinge Kumponinge Aadama bokuvuma aa'puu', "Da' are' otomang?" <sup>10</sup>Ee'noko teie aa'puu', "Ninge da'koong aorong mintoonge naniko taararamira amoromira simpenoi' deemarama oome'neeng-koo baku'maring."

<sup>11</sup>Ee'noko Kumponinge aa'puu', "Da' baie simpenoi' oting nauruing? Ai' tee koi'koong sinang orokorantu'navari-koong maa'ei?" <sup>12</sup>Ee'noko teie aa'puu', "Tenie anie manikumai dake ni'ninka nari' o'noree'naang ameu'nanie tee-koo koi'koong-koo sinang-koo amuio' maa'kansing."

<sup>13</sup>Teketa teie Ovinge Kumponinge teni manikuma aa'puu', "Dake tee aming-koo tee' nkoveing?" Ee'noko tenie manikumai aa'puu', "Boru'ke tosimuio' tee' ninge maa'ansing."

<sup>14</sup>Teketa Ovinge Kumponinge tee boru' aa'puu', "Dake tee tee' oro' kapoo' nkoveing-koo dakaang barakosi' tee dau basi ookara kau'karenaumo-nanka bau'naananka-koo ee'noko pora'koonanka-koo. Da' tee ke'dei nanimatoaing otoainaroong-koo tee nankanankara maa'ema. <sup>15</sup>Ee'noko ninge tee dee'naanka da' ee'noko ani manikuma karenaanka deeng-antarampeaing ee'noko napo' teing dee'ke deurukaa' tee'ke kare-

nupoong otoromaatoaing. Teni baurukaa'koo narunge<sup>b</sup> da' bore'koo puuturuiaing ee'noko dake tee kanko'bo-koo kakieai.”

<sup>16</sup>Napo' teni manikuma aa'puu' Kumponinge, “Ninge tee da' pankaing sisikeera arompaing tenang parema mantompemaatoaing. Sisikeera ninka parematoaing. Nka tee, da'ung-koo pia otoi otoaing, ee'noko bakaang pia siompemaatoai.”

<sup>17</sup>Ee'noko napo' Aadama-koo aa'puu', “Dake teni da'aang bakaang kara taaravera tee koi'koong sinang orokoantu'nung maa'eing-koo, ninge tee kansi' taamang keentoma barakosi'ansing taamananka tampa' nkoarava' otoaing, ee'noko da' pore'doma deeko' tee-koo kansi'koo taamanimatoaing ookara batei da' otoaining-koo. <sup>18</sup>Ee'noko kansi'keta koi'nanka too'murintaa'po'nanka dupuai, napo' baa'nanka orananka dupuai, ee'noko dake maa'koo pora'kooning baa'nanka maa'emaatoai. <sup>19</sup>Ee'noko iontaakaanang mintoontarama taamanimatoai, bera doora kansi'koo tororaravainoo'ke basi, te' ee'noo' da' nkorantu'noo', ai' da' tee da'mong, napo' da'mong-koo doonko tororaravaing.”

<sup>20</sup>Ee'noko Adamai teni ba'aang miring Iivi<sup>c</sup> tampuu', ai' teni teni ookara nantoong amutemurii' bioko.

<sup>21</sup>Ee'noko Kumponinge Ovinge kau'karenaumo-nanka-koong dopa'koo mononopa' nkovura Aadama ee'noko teni Iivi avuretu' kurumparee'naang.

<sup>22</sup>Teketa Kumponinge Ovinge aa'puu', “Aung tee naning nii'pina' oro'paring aa'noing kapoo' tampara ee'noko orara noru'ui. Emu' tee koi' domang isikung avu'navari-koo due' be'koo taura'pampiauka', tevari-koong sinang maa'ura napo' domampari oto'neenga.” <sup>23</sup>Tee'pura Ovinge Kumponinge tenau-eta Iideni'nau-eta bata'uu' tamung pora'ke mintoomparaa'naang, tee naning kansi'ketaing kansi' nenke'uma. <sup>24</sup>Tenang Kumponinge tering bata'ureta, tee-koo tenau-koo Iideni'nau-koo duaa' pomanoo'aapenameng-koo koosinunanka purinto'nanka donkong-antavuru', tee tevung taung koi' domang-anta-aape be'navung para'ai otoromaatoo'naang, bainatu nta'pina' urung kompai eevaavaama.

**4** <sup>1</sup>Enang tee Aadama Iivi-ninka ba'aang ninka otoreseni teni kempo'kuu'. Teketa tooto' narung donkaani paravuu' tenie, miring Keini'.<sup>d</sup> Ee'noko aa'puu' tenie, “Ninge narung donkaani paravansing Ovinge pakumuio'.” <sup>2</sup>Napo' kemu'kana' tenie donkaani Keini'ke

---

<sup>b</sup> 3:15 Aung tee Kumponinge Teroita Pako'pari'nii' nantoong domaang moo'urira tarevuriaing. Tee-koo nauvurema Kumponinge Aadamararing tee doorenang tampara nauvuretu'. <sup>c</sup> 3:20 Iiburu-nupoong biikaang kara-koo miring “Iivi” tee “Bioko” miru'ari otong. <sup>d</sup> 4:1 Iiburu-nupoong biikaang kara-koo miring “Keini” tee “Nkavansi” pina' aurompari otong, ee'noko tee miring “Eebelo” tee “Domang-kera” miru'ari otong.

baara'ma'nung paravuu' miring Eebelo'.<sup>e</sup> Eebelo' sipisipi'nanka tanata deemparu' ee'noko Keini' mintoong nkonara.

<sup>3</sup>Dama'ke tee Keini'ke tee-koo keenkeenanka-koo sinananka nkavurira Ovoring-koo boontunamparu'. <sup>4</sup>Ee'noko Eebelo'ke sipisipi'nanka-koo nii'ning tutuna'ning-kooning dato'urira menaanka dovang-nairu ninka boontunamparu'. Ee'noko Ovoring Eebelo'koo aa'na' dotuaru' ee'noko tee-koo bakaang-koo boontunang-koo. <sup>5</sup>Teka Keini'koo ee'noko tee-koo bakaang-koo boontunang-koo dotuaravaruu'. Ee'noko Keini' tee'koo aa'na' iirai oing oraka' oro'paru'.

<sup>6</sup>Ee'noko Ovoringe aa'puu' tee Keini', "Da' aming-koo iirarora oing oraka' oro'daramang? <sup>7</sup>Da' tampa' boontunantaravaing deeko' ning da'koo dotumaravaing, ape' aung? Teka tee dake kapoo' orara nkoveko deeko' tee orara aarumo maamuari otong da' kurumaa'koo. Nka dake purintarara puru'eaing tee."

<sup>8</sup>Teketa Keini'ke tee baara'ma'nung Eebelo' bokuvuma aa'puu', "Poai io' tokoi pora'ke korokoromareai." Ee'noko tenang pora' bereta Keini' tee-koo baara'ma'nung-koo Eebelo'koo dau kokoroarara teka tavuma dupisi'uu' tee.

<sup>9</sup>Tenang Ovoringe aa'puu' tee Keini', "Eebelo' arerai tee daara'ma'nung?" Ee'noko Keini'ke aa'puu', "Ninge noru'ampa' tee, ai' ning tee ntara'ma'nung tare-koo si'meu'nunge?"

<sup>10</sup>Ee'noko Ovoringe aa'puu', "Nka dake aming nkoveing? Tee daara'ma'nung bakaang ereng-koong aurong tee ning-koo biromparamang kansi'keta. <sup>11</sup>Emu' tee da' barakosi'dama aa'damaang: Anketa kansi'keta da' tenkeniaing, a' te' kansi'noo' daara'ma'nung-koong ereng tuuvuio' naivuinoo' daka dake dupisi'eio'. <sup>12</sup>Da' tee pore'doma kansi'koo keempeko taamang tampa' nkoaravauka'nung ee'noko tokoo dakanoo' masipo' oto'deruauka', tamung kansi'koo kororaramatoaing."

<sup>13</sup>Teketa Keini'ke aa'puu' tee Ovoring, "Ee baka', aung tee kiimata pankaing masakung. Dake ameio' orarunsie dupisi'muu'naang. <sup>14</sup>Dake tee ning e'mung bata'meing anketa kansi'keta, ee'noko dakaang biraanke-ita baku'meinge. Ee'noko tokoo nkanoo' oto'memuauka'; tamung kansi'koo koromarama'noaing. Naninge tokoa oomura deeko' tamung anutua dupisi'muaing makosie."

<sup>15</sup>Teka Kumponingee aa'puu' tee, "A, tee' deea'. Nii'nung naninge da' taruma dupisi'duaing deeko', tee naning tee ninge aa'na' dau basinoo' kiimata avompaing." Ee'noko Ovoringe Keini'koo taa'ni'anta sipuu' naninge tokoa oovura tavu'neeng-koo tee. <sup>16</sup>Teketa tenang Keini' Ovoring-ankoita tenkenuu', ee'noko bera Ata'nanu' tampaama-nameng-koo beu' teketa lideni'keta duaa' pomanoo'aapenameng-koo.

---

<sup>e</sup> 4:2 Iiburu-nupoong biikaang kara-koo miring "Keini" tee "Nkavansi" pina' aurompari otong, ee'noko tee miring "Eebelo'" tee "Domang-kera'" miru'ari otong.

### Keini' Bakanaving

<sup>17</sup>Emu' tee Keini', osi pankaing kanivui otoko, ba'aang kempo'kura bauring donkaani paravuu' miring Iinoke; ee'noko Keini'ke tee osi opura napo' Iinoke namirimpuu'. <sup>18</sup>Ee'noko Iinoke tee Irat bauma. Tee Irat tee Meusiel bauma, ee'noko Meusiel tee Metusiel bauma, ee'noko Metusiel tee Leemeki' bauma.

<sup>19</sup>Ee'noko Leemeki'ke kenaanka manikumaara nampuretu'. Nii'nani-koong miring Eda, ee'noko nani Sila'. <sup>20</sup>Ee'noko Edai Jabal paravuu', Jabal tee teing pora'ke nanaama boromaka'nanka tareariko'ning biuma. <sup>21</sup>Tee Jabal baara'ma'nung miring Jubal, ee'noko tee Jubal tee teing nantoong kovi dovang kiita kompaamaing biuma. <sup>22</sup>Dama'ke napo' tenie Sila'ke Tubokein paravuu'. Tubokein tee teing nantoong baraasi~ dovang-koo aini aa'ning-koo kapoo' nkonuka biuma. Tee Tubokein ba'mari miring Naama.

<sup>23</sup>Nii'na'mung Leemeki'ke tenaanka ba'aankaara nauvurema aa'puretu', “Eda naanka Sila' ee, nkaang kara tampa' masika' taaramereai. Naninge narunge nemakai ning baikemuio' ninge dupisi'ansieeng maku'koo, ee'noko ba'marange mero'koo piavorora deeko' ee' nauarampaing, <sup>24</sup>‘Baa naning Keini' dupisi'uaing aa'na' dau basinoo' kiimata nkavuaing, ee'noko naning ning tamuaing bakei aa'na' aa'na' kiimata dau basinoo' kompuaing.’”

### Set Bakanaving Tampaving

<sup>25</sup>Dama'ke napo' Aadama ninka otoresi ba'aange tooto' narung donkaani napo' paravuu' miring Set,<sup>f</sup> ee'noko tenie aa'puu', “Kumponing tooto' narung napo' amuing Eebelo' pari'antanung tee Keini'ke dupisi'uu'nung.” <sup>26</sup>Dama'ke napo' Set bauring ponto'aru' ee'noko Iinosi' tampuu'. Tenang ee'nang nantoonge Kumponing Iaaue<sup>g</sup> tampaama dootuu' tutumpariru'.

**5** <sup>1</sup>Aung tee Aadama bakanaving-koong mirinanka, tee naning Kumponing nkovuu'nung baka bakaang oro' siompui otoko. <sup>2</sup>Kumponing kenaankara nkovuretu', donkaani ee'noko manikuma, ee'noko biraankevureta “naninka” tampuretu'.

<sup>3</sup>Tenang Aadama mare' narung daaku'keta beenaumo kivora [130] deemparama bauring narung nkoaru' tee-pina' masika' oro'. Miring Set tampuu' tee. <sup>4</sup>Temare'keta Set ponto'aru'namare'keta deto Aadama ~beenaumo-taa daaku' [800] mare' otou', ee'noko teing-koo mare'koo

<sup>f</sup> 4:25 Iiburu-nupoong biikaang kara-koo miring “Set” tee “Avuavu” pina' aurompari otong. <sup>g</sup> 4:26 Tee miring Iaaue tee Iiburu'na' miring Kumponing-koong; “O'noi O'nomaung” pina' auromparamaung.



kuunge napo' nii'ning baurukaa' donkaang ee'noko maniku' nkoariru'.  
<sup>5</sup>Ookara mare' naro'ka Aadama otou'ning ~karenaumo-taa daaku' bera  
 beenaumo kivora [930] deemparama bou'.

<sup>6</sup>Teketa tee Set mare' narung daaku'keta pa'noko' [105] deemparako  
 bauring narung ponto'aru' miring Iinosi'. <sup>7</sup>Temare'keta Iinosi'  
 ponto'aru'namare'keta deto tee Set ~beenaumo-taa daaku' bera  
 ~kenaanka-taa [807] mare' otou', ee'noko teing-koo mare'koo kuunge  
 napo' nii'ning baurukaa' nkoariru' donkaang ee'noko maniku'. <sup>8</sup>Ookara  
 mare' Set otou'ning naro'ka ~karenaumo-taa daaku' bera kivora-ita  
 kenaanka [912] deemparama boo'paru'.

<sup>9</sup>Tenang tee Iinosi' mare' ~karenaumo-taa kivora [90] deemparama  
 bauring narung nkoaru' miring Kenan. <sup>10</sup>Temare'keta Kenan ponto'  
 aru'namare'keta tee Iinosi' ~beenaumo-taa daaku' bera kivora-ita pa'noko'  
 [815] mare' otou', ee'noko teing-koo mare'koo kuunge napo' nii'ning  
 baurukaa' ponto'ariru', donkaang ee'noko maniku'. <sup>11</sup>Ookara mare'  
 Iinosi' otou'ning naro'ka ~karenaumo-taa daaku' bera pa'noko' [905]  
 deemparama boo'paru'.

<sup>12</sup>Teketa tee Kenan mare' ~kenaanka-taa kivora [70] deemparako  
 bauring narung Maaleli' ponto'aru'. <sup>13</sup>Ee'noko temare'keta Maaleli'  
 ponto'aru'namare'keta deto Kenan ~beenaumo-taa daaku' bera  
 karenaumo kivora [840] mare' otou', ee'noko teing-koo mare'koo kuunge  
 napo' nii'ning baurukaa' nkoariru', donkaang ee'noko maniku'. <sup>14</sup>Ookara  
 mare' Kenan otou'ning naro'ka ~karenaumo-taa daaku' bera kivora [910]  
 deemparama bou'.

<sup>15</sup>Tenang tee Maaleli' ~narung-taa kivora bera pa'noko' [65] mare'  
 deemparako bauring narung Jerete' ponto'aru'. <sup>16</sup>Temare'keta Jerete'  
 ponto'aru'namare'keta deto Maaleli' ~beenaumo-taa daaku' bera  
 beenaumo kivora [830] mare' otou', ee'noko teing-koo mare'koo kuunge  
 napo' nii'ning baurukaa' ponto'ariru', donkaang ee'noko maniku'.  
<sup>17</sup>Ee'noko ookara mare' Maaleli' otou'ning naro'ka ~beenaumo-taa daaku'  
 bera ~karenaumo-taa ee'noko pa'noko' [895] deemparama boo'paru'.

<sup>18</sup>Teketa Jerete' mare' narung daaku'keta ~narung-taa kivora bera  
 kenaanka [162] deemparako bauring Iinoke ponto'aru'. <sup>19</sup>Temare'keta  
 Iinoke ponto'aru'namare'keta deto Jerete' ~beenaumo-taa daaku' [800]  
 mare' otou', ee'noko teing-koo mare'koo kuunge napo' nii'ning baurukaa'  
 ponto'ariru', donkaang ee'noko maniku'. <sup>20</sup>Ee'noko Jerete' ookara mare'  
 naro'ka ~karenaumo-taa daaku' bera ~narung-taa kivora-ita kenaanka  
 [962] ota bou'.

<sup>21</sup>Tenang Iinoke mare' ~narung-taa kivora-eta pa'noko' [65]  
 deemparako bauring Metusela' ponto'aru'. <sup>22</sup>Ee'noko temare'keta  
 Metusela' ponto'aru'namare'keta Iinoke beenaumo daaku' [300] mare'  
 otou', Kumponing ninka nari' tampa' navuaresi, ee'noko teing-koo

mare'koo kuunge napo' nii'ning baurukaa' ponto'ariru', donkaang ee'noko maniku'. <sup>23</sup>Ookara mare' Iinoke otou'ning naro'ka beenaumo daaku' bera ~narung-taa kivora-ita pa'noko' [365]. <sup>24</sup>Iinoke tee Kumponing ninka tampa' navuareko'noo'koo Kumponing nkavuiu' napo' nantoonge ooaavaruu'. (Iiburu 11:5)

<sup>25</sup>Teketa Metusela' mare' narung daaku' bera ~beenaumo-taa kivora ee'noko ~kenaanka-taa [187] deemparako bauring Leemeki' ponto'aru'. <sup>26</sup>Temare'keta Leemeki' ponto'aru'namare'keta ~kenaanka-taa daaku' bera ~beenaumo-taa kivora-ita kenaanka [782] mare' otou', ee'noko teing-koo mare'koo kuunge napo' nii'ning baurukaa' nkoariru', donkaang ee'noko maniku'. <sup>27</sup>Ookara mare' Metusela' otou'ning naro'ka ~karenaumo-taa daaku' bera ~narung-taa kivora-ita napo' ~karenaumo-taa [969] deemparama boo'paru'.

<sup>28</sup>Tenang napo' tee Leemeki' mare' narung daaku' bera ~beenaumo-taa kivora-ita kenaanka [182] deemparako bauring narung ponto'aru'. <sup>29</sup>Ee'noko miring Nooa<sup>h</sup> tampuu', aa'puma, “Aung tee nii' unaa-antamuriaing teieta iri'o'keta aung kansi' mintoompampima kompampimaung-eta Kumponing barakosi'uu'nung.” <sup>30</sup>Temare'keta Nooa' ponto'aru'namare'keta Leemeki' pa'noko' daaku' bera ~karenaumo-taa kivora-ita pa'noko' [595] mare' otou', ee'noko teing-koo mare'koo kuunge napo' nii'ning baurukaa' ponto'ariru', donkaang ee'noko maniku'. <sup>31</sup>Ookara mare' Leemeki' otou'ning naro'ka ~kenaanka-taa daaku' bera ~kenaanka-taa kivora-ita ~kenaanka-taa [777] deemparama boo'paru'.

<sup>32</sup>Ee'noko Nooa' mare' pa'noko' daaku' [500] tamung otera baurukaa' beenaumo ponto'ariru' aa'ning Siemi', Aam ee'noko Jepat.

## 6-50

*6-50 Anketa Mme' Bere'arava'navaro. Tankee'noo' 6-50 mme' bere'arava'. Sikuuna-koo nii'na' Iinkirisi'koo deeruampipeu' Kumponing nantoong biikaang orara aarumo-koo piavoarura douai kansi'keta tonta'uru'na', Nooa'daang nakange deeko' duukaa deng-antavuri. Napo' deeruampipeu' nantoong mmau' naro'ariri Kumponing bei'bei'aako teie biikaang kara amutemurii'na' paari-antaevuriko bereravariru'na', bera nantoonge ookara kansi' maanto'uru'. Teketa napo' naumurimaung Kumponing Eebaraami' bokuvui miru'uu'na' ookara Karistoo'koo baito-nupoong biuma deemparaa'naang, maraka-anta tampeng avurira.*

<sup>h</sup> 5:29 Iiburu-nupoong biikaang kara-koo miring “Nooa” tee “Unaa-anta” miru'ari otong.